



# Puggut anernerat Inalukkerineq nutaalliornerlu

Sofie Ammondsen - Soam Unni & Randi Sørensen Johansen - NKA


Puggut anernerat - Inalukkereriaaseq nutaaliornerlu  
Kalaallit Nunaanni uumasut inalugaanik sammisaqaqtiginneq

© 2025 Nunatta Katersugaasivia Allagaateqarfialu (NKA) kiisalu Soam Unni.

Allattut: Sofie Amondse (Soam Unni) & Randi Sørensen Johansen (NKA).  
Quppersakkamut katiterivoq: NKA 2025.  
Tuluttut nutserisoq: SIKKI - Aviaja Schøler.

Saqqaani assitaliussaq: Pooq. Sofie Amondsinip ilitsiviliaa 'Pooq' (2025). Assiliisoq David Ottosen (2025).  
Assimik piginnittooq Nunatta Katesugaasivia Allagaateqarfialu.

Quppersakkat suliarineqarnera siulleq (2025)  
Quppersagaq tuluttut allannilik aamma nassaassaavoq.



Nunatta Katersugaasivia Allagaateqarfialu  
Greenland National Museum & Archives

## Aallaqqaasiut

Inalukkat pillugit sammisaqaqtigijittooqareernerup kingorna quppersagaara una pilersinneqarpoq. Eqqumiitsuliortoq Julie Bach inalukkanik misilittagaqalereerluni suleqatissarsiorneratigut sammisaqaqtigiinnejukioq 2024 Nuummi aallartisarneqarpoq. Suleqatissatut mersortartoq Sofie Amondsen kiisalu Nunatta Katersugaasivia anguai, ataatsimoorussamillu suliaq ingerlanneqarluni. Quppersagaararli una Sofie Amondsenip annertusisamik inalukkat pillugit misissuereerneratta kingorna pilersinneqarpoq. Inalukkereriaatsit nunatsinneersut misissuataareerlugit ilisimasat katarsorlugit allaaserineqartumi atuarneqarsinnaapput. Ataatsimoorussamik sammisaqaqtigiinnejuk Puggut anernerat - Inalukkereriaaseq nutaaliornerlu-mik qulequtaqarpoq.

Quppersagaaraq tamanit atorluarneqarsinnaanissaanik neriuuteqarpugut.  
Inalukkererusussaguit una qupersagaq isumassarsiffigilluarsinnaavat”  
- sammisaqaqtigiit kissaataat.

*Quppersagaq pilersinnissaanut piviusunngortitsisuupput:*



NAALAKKERSUISUT  
GOVERNMENT OF GREENLAND



Puulukip inalugaa illup iluani panerserlugu niviningatitaq



# Puggut anernerat

## Puggut anernerat - Inalukkerineq nutaaliornerlu (2024-2026)

Amernik mersortartoq Sofie Amondsen, annoraamineq atorlugu eqqumiitsuliortoq Julie Bach aamma Nunatta Katersugaasivia ataatsimoorussaminnik projekteliorput inalukkat aallaavigalugit eqqumiitsuliorneq aamma kulturikkut kingornussatta paassisutissartaannik sammisaqartumik.

Siunertaavoq tamanit paasineqarsinnaasumik puisip inalugaanik passussisarnermi periaatsinik ilinniartitsinissaq, ileqqoq nunatsinni arriitsumik tammariaartuaartoq pinaveersaartinniarlugu. Projektimik ingerlatsisut isumaqarput inalukkerinerup isumaa, qanoq passunneqartarnera suullu periaatsit atorneqartarnersut pillugit iliuuseqarfingeqartariaqartoq tammatsaaliornegassasorlu. Suliniummi misileraalluni suliassat aqqutigalugit ingerlanneqarput, ilisimasat annertusarneqarnissaat kisiat anguniarneqanngilaq, tassami inalukkerinermi periaatsit nammineq ataasiakkaarluta misilitarpavut, aamma kulturikkut suliaqartut akornanni isumassarsiorfiusumik suleqatigiinnermik siuarsaasuuvooq kiisalu ileqqut pingaaruteqartut tammatsaaliornegarnissaannut avitseqatigiissutigineqarnissaannullu iluaqtaasoq.

Inalukkat panertitat atortussatut oqitsutut, anersaartortutut aamma sitsiaatsutut ilisimaneqarpoq. Ilisimasat taakku atorlugit Sofie Amondsenip aamma Julie Bachip Katersugaasivimmi suliaminnik immikkut saqqummersitsipput.

Saqqummersitami takutinneqarpoq inalukkanik suliat pisoqqat toqqortaatitsinniittut qanoq isumassarsiorfigineqarsinnaanersut, assarsorluni nutaaliornermi aamma eqqumiitsuliornermi. Allatut oqaatigalugu, suliniutip pilersippaa siulitta inalukkanik assasassorlutik mersugaat aamma nutaaliornuni assassukkat imminut atassuserneqarnarnerat.


Immikkut saqqummersitami, Sofie Amondsenip ilusilersugai mersugaalu Pooq aamma Qaamanertaq takuneqarsinnaasut ilagissavaat. Sofiep saqqummersitamini pingaartippaa inalunnik suliaasut angerlarsimaffimmi tulluartuunissaat, ullutsinnut naleqquttut. Pigisat akornani atuuffeqartillugit inalunnik suliat piujuartinneqarsinnaalersarput. Kooreq Pooq, taassumap imarivai nuersagassiat, angerlarsimaffimmi eqqisisimaarluni sukisaarutip puussai, erlinnartuutissanik immerneqarluarsinnaakutsoortoq. Kiisalu Qamasortaq, qullip peeriata assersorsinnaanissaanut pilersitaq. Qaamaneq inimut tunniunneqartoq eqqisisimaarnartumik misigitilsersitsisinnaasoq.



Qaamasortaq, Sofie Amondsenimit suliaq (2025). Ussup inalugaanik mersugaq.  
Assiliisoq NKA (2025).

Saqqumersitami Julie Bachip ilusilersugai aamma takuniarneqarsinnaapput, tassasut arnama assai, angumma niui pigisaraakka, aallaaviga, piffiup ingerlanerani attavik kiisalu eqqaassutissatut pinnersaasiat. Juliap inuunermi aallaavini uummammioralugu eqqumiitsuliani pilersippai. Arni inalukkerekatigalugu nипит immiunneqarsimasut saqqummersitsivimmi tusaaneqarsinnaapput, kiisalu inalukkat suliarinerini siorpalunnerisa nipaat tusaaneqarsinnaapputtaaq.

Saqqumersitat taakku Nunatta Katersugaasiviani katersaatigineqartunik akoorneqarlutik saqqummersinneqarput. Kiisalu inalukkerinermi qanga atorneqartartut suuneri saqqummersinneqassallutik. Taamaasilluni saqqummersitat tamakkiisumik isigigaanni nutaaliorneq - eqqumiitsuliorneq - siulivut pigisaannut atassuserlugit takutinneqarlutik.



Arnama assai II, Julie Bachimit suliaq (2025). Puulukip inalugaanik mersugaq. Assiliisoq Soffi Chachira Larsen (2025).



Nunatta Katersugaasiviani kapiseq toqqortaatigineqartup misissuataarneqarnera (2025).  
Quppermi talerpiata tungaaniiuttoq asseq: Ussuup inalugaa uluttorneqarnera.  
Allermiipput: Aataarsuup inalugaanik kiliortuineq kiisalu puisip inalugaa seqiarneqareersoq qiaarneqareersorlu.

# Ilisimasanik avitseqatigiilluni suliaqarneq

Saqqummersitsinissaq sioqqullugu februaarip qaammataani ukioq 2025 suliniummi qangatut inalukkerisarnermi saliineq, panersutitsineq, qiortaaneq mersornermilu kilut sitsiaatsut atornerinik ilisimasanik katersuiffiuvoq.

Suleqatigiit Nuummi amernik mersortarfik Kittat peqatigalugu assassorluni suliaqaatigaluni qangatut inalukkerinermut ilisimasanik tunngasunik avitseqatigiipput. Kittaneersut Sara Marie L. Berthelsen aamma Johanne Markussen mersoriaatsinik taaguutinillu ilisimasaminnik avitseqateqarput. Kiisalu Nunatta Katersugaasivianiit katersugaasivilerisut Aviâja Rosing Jakobsen aamma Randi Sørensen Johansen katersaatigineqartut; allagaataasut inalunnillu suliaasut pillugit saqqummiillutik. Periutsit tulleriiaarlugit ilinniarfigalugit misilittaalluni ingerlatsisoqarpoq. Misilittaanermi nutaaliorsinnaaneq aamma pingaartinneqarpoq.

Ussuup inalugai, aataarsuup, allattuuaqqap kiisalu puulukip inalugai suliarineqarput. Inalukkat silissusaat assigiingiiarneri ilinniarfigalugit, ninngussusaallu maluginiarlugit aallaqqaataaniit aaliangiunneqarpoq sammineqarnissaat. Nutaatullu maskinatigut inalunnik misussineq aamma misilittaassutigineqarluni. Inalukkat silaannap kissassusaa, qerinnartumiit illup iluata kissassusaatut, assigiinngitsuni panerserneqarput, inernerri allanngorarneri malinnaavigalugit.

Inalukkat panersernerisa kingorna qiortarneri sammiviit assigiinngitsut misilittaassutigineqarput, inalukkat namminerisamik ilutsiminni allanngorartuupput. Avitseqatigiinnermi suliaqarnermi mersoriaatsit assigiinngitsut misilittaassutigineqarput. Inalukkap kilui qanoq sitsiaatsumik inernilerneqarsinnaaneri iluatsinngikkaluartoq, mersornermi periutsit qanoq isikkoqarsinnaaneri misilittarneqarput. Sammisqaqatigiinneq assorsuaq pissarsiaqaataavoq.

**Misilittaatit** panersiinerit, qalipaasersuineq, kilut sitsiaatsunik naliginnaasunillu mersorneq.



Puisit inalugaannik kiliortuineq, misilittaaneq.  
Kiisalu, inalunnut imilersarissanik qalipaaneq. Paasisallu inernerri oqaluuserineqarnerat.

Illuikkiaq inalukkanik igalaalik. Uummannatsiam assilisaq ukioq 1909.  
Assilisoq Arnold Heim. Assimik piginnittoq Arktiske Institut.



## Siulivut qangaaniilli inalukkerisarnerat

Ammerinissamut ilisimasat issitumi najugalinnut ilisimassallugit nalimmassartassallugillu pingaaruteqarpoq. Ammit sorliit sunut atorneqarnissaat ammillu aaliangersimasut qanoq suliarineqarnissaat siulivut ilisimalluarpaat, ammit atortuliassat atisaliassallu immikkut atuuffissaminnut tulluarsarlugit suliarineqartarlutik. Ammerineq imaannaanngitsuunngilaq, suliaq ineraangat ammerineq naammassineqarneq ajormat, tassami naammassisaq atorneqartuartillugu aaqqissuunneqartuassammata.

Mersornermi nunamiutat, imarmiutallu uumasuisa amii ilusilorsorlugit ilisserlugillu atortussianngortinneqartarput. Taamatuttaaq timmissat amii, aalisakkat aammattaaq uumasut ilormiui; torlut ameraasaat, aqajaqqut, ujallut kiisalu inalukkat ammerinermi assassornermilu atorluarneqartartut ilagaat.

Inalukkanik suliaqarneq qanga siulliarsuit annertusisamik aallutarigaat ilisimaneqarpoq. Inalukkat suliarilluarneqarnerminni masassiutissaqqissutut pilersinneqartarsimapput. Pilersitat tamarmik atorluaanermik aallaavillit.



Puisip inalugaq imaanut aaverneqartoq, imermik immerneqarluni ukioq 1935. Assiliisoq Robert Gessain. Assimik piginnittooq Nunatta Katersugaasivia Allagaateqarfialu.

**Oqaluttuarisaaneq** Kalaallit Inuit qangaaniilli uumasut inalugaanik sanaajusunik pigisaqartuartarput. Puisit inalugai, aarrit, arferit kiisalu nannut inalugaanik suliaasunik nassaassaqarpoq. Inalukkat, siaarlugit ilusilersorlugit suliaasarput. Inalummik igalaaliortarneq, siulitta issunik ujaqqanillu qarmagaasunut igalaarisartagaat. Tupermullu umigisartagaat; tassa toqqup isaariaata ammarngata matua. Taamaalillutik avammut itsuarsinnaasarlutillu qaamaneq inigisap iluanut isaasinnaalersittarpaat. Ukiut 200-t matuma siorna igalaamerngit igalaassiat Nunatsinnut tikiussuunneqartalermata inalunnik igalaat takussaajunnaariartorput. Inuillu ikitsuinnaat igalaaliornissamut ilisimasaq ingerlateqqippat. Pooqattat, ippiarsuit, kapisat (annoraat masannartorsiutit), pinngussanullu inalunnik sanaajusut ilisimaneqarpoq, soorlutaaq ileqqulersuutinut atorneqartarlutik, soorlu qilaatip isaanut. Ukiut 100-t matuma siorna atortussat tamakku suliarineerukkiartorput, niuertarfinni nioqqutissat inunnut ammaanneqarnerisa kingorna, tamanna ersippoq Nunatsinni ukioq 1948-49 sumiiffinni ataasiakkaani misissuisoqareernerata kingorna.




Kapiseq annoraarineqartoq. Assimik piginnittoq Nunatta Katersugaasivia Allagaateqarfialu.

**Itsarnisarsiorneq** Inalukkanik sanaajusut itsarnisarsiornikkut nassaarissallugit killeqartarput. Inalukkat namminerisamik ukiut ingerlanerani arrortarneri sukkasarmata. Kisialli Kapisat, Nunatsinni inalukkanik sanaajusut ukiuni 600-nik pisoqaassuseqartut nassaarineqarnikut ilagaat. Itsarnisarsiornikkut assaanitsigut kapisat pingasut Nuulliini (Avanersuarmi) inunniq inoqarfiusimasumi nanineqarput. Nasaat ilisserusioriaasiinik ilisimasanik pissarsiaqarfipput.

Paasisani ilaavortaaq mersoriaatsit marluk atorneqarneri, akussitat kiisalu pussutsiinnavillugit mersukkat.

Nassaani taakkunani qasigissap aarrullu inalugai atorneqarput, puisit angissusaat aallaaviullutik inalukkat assigiiinngiiaanik silissuseqarput; 4 cm-imiiterimiit 13 cm angullugu silissuseqartut. Paasisat aamma ilagilluinnarpaat qanoq ilisserneqarneri kiluilu qanoq akulikitsigineri. Kilut qilalukkap qaortap tikaagulliullu ujaluunik ujaloqarlutik. Mersuunneri pussutsiinnavillugit mersugaapput, 10 cm-imiiteriugaangata 20-30-inik kiloqartarput. Kapitsat pinnersaasernerri akussillugit mersugaapput, erisaat atorneqarlutik.

Ukiuunerani mallertsillugu qajartornermi annoraap qaavatigut kapiseq atorneqartarpooq. Qajartornermi nunamiluunniit pingaartumik masannartuliortillugu atorneqartarluni. Angutit, arnat meeqqallumi kapiseqartarput.



Kapisit nassaat  
assilineqarneri  
titartarneqarnerilu.  
Assiliisoq Roberto  
Fortuna, Danmarkip  
Katersugaasivianeersup  
assilisarai (2020).  
Kiisalu ilusilersukkat Erik  
Holtvedip ukioq 1954-  
imi titartagaasa  
assilineqarneri.

**Ilisimasat:** Qangaaniilli ammerinissamut ilitsersuineq pisarpoq takutitsinikkut - kinguaariinniit kinguaariinnut ilinniartitsineq ileqquuvoq.

Nunatta avataaniit tikittuniit, nunarput pillugu ilisimasassarsiortut nalunaarsuisullu kiisalu nunasiaateqarnerup nassatarisaanik nunatsinnut nunasisut akornanni allaatigisat ukiunik 300-nik pisoqaatigisut inalukkanik suliaqartarneq inalunnillu suliaasunik pisataqarneq allaaserineqartarput.

Allaatitoqqat pisoqqat aallaavigalugit inalukkat nutaajutillugit iginnermut ullualuit kininneqartarput, taamaaseriarlutik suliarinnittup kigumminik qiaava seqiaalu piiartarpai, inalugaannavik kiserngorulluni. Suliaq ajornanngisaarneqassatillugu; iginneq inalukkap iluanut kuineqartarpoq. Inalugak seqiareeraangat qiarneqaraangat imaanut kininneqartarpoq, aaverluarniarlugu. Taamaaseriarlugit pullanneqassapput panerserneqassallutillu.

Uumasut imarmiutat inalugai kiisalu puisip iggiaa assessorluni sanalunnermi atorneqartarput. Puisit angisuut mikisullu, aarrit, qilalukkat qaortat inalugai atortussiarisimasat takussutissaqarpoq.





## Aarnussat mersugussimasut

Oqalualaani oqaluttuatoqqanilu tusartarpavut siulitta upperisarigaat inuit uumasullu qanilaassusaat - uumasut nukii inunnut atukkiunneqartarneri.

Tamanna katersugaasivimmi katersaatigineqartuni aamma nassaarineqarsinnaalluartarpoq. Qanga siulliarsuit piniarnermi sakkunik atortunik pigisanillu pinnersaariaaseqarput. Pinnersaaneq piginnittumut nuannaalersitsisarpoq, uumasunut qanillattuutaavoq, pinerrarissunngorsaataavoq isumannaatsumillu inuunissaq qulakkeerniarneqartarluni. Kapisat marluk maanna katersaatigineqartuni arnussanik allalersornillit takuneqarsinnaapput. Allalersornerisigut, tassa pinnersarneratigut, uumasut piginnaasaat, qasujaassusaat nukiilu inummut atukkiunneqartarput.

Allalersorneri Kapiseq Tasiilameersoq ukioq 1935-mi mersorneqartup takutippaa nannup sarngisa assilillugit pinnersaasiarineqarneri. Kapiseq taanna inalunniq mersugaavoq, erisaanik, puisip amianik meqqiakkamik allalersugaq. Allai amitsunngorlugit titarnertullusooq isikkunitsillugit akussillugit mersugaapput. Tassa imaappoq kapisip inerneqareernerata kingorna pinnersaartai mersugunneqarsimapput, ima isumaqartinneqarlutik, tassa Nannup pissaanera inummut atukkiullugu atisaanut allerlersuutitut mersugunneqartoq.

Nannup sarngisa arnuarineqarneri issittormiut inuit pisataasa akornanni nassaassaalluartarpoq. Tassaasoq ukioq 500-mi Tunermit (Dorsertiumit) aarrup tuugaavanut alernerup nanua qiperugaq. Qiperugaq Igloolimmi, Canadamt aallaaveqartoq maanna nassaarineqarsimavoq suli pisoqaanersaalluni.



Jens Rosingip kapisaa Nunatta Katersugaasiviani toqqortaatigineqartoq. Kapiseq 1935-imi Tasiilami mersorneqarpoq. Jens Rosingip nammineq kapiseq assilillugu titartarsimavaa. Asseq talerpiata tungaani qullermiuttoq tassaavoq qiperugaq Igloolimmi nassaarineqartoq.

Kiisalu, Kalaallit Nunaanni aarrit anersaavi nannutulli ataqqineqarluinnartut ilagilluinnarpaat. Kapiseq alla katersaatigineqartoq tuugaat assilillugit allalersugaasoq Katersugaasivimmi toqqortaatigineqarpoq. Aarrit piniassallugit, pisarlu isumagissallugu imaannaanngitsuuvoq. Inuit arlallit ikioqatigiinnikkut piniagarisarpaat, sikukkut amuartarpaat. Arrit piginnaasaraat sivisuumik aqqaamasinnaanertik. Kapiseq taanna ukioq 1883-85-mi Tasiilami mersorneqarsimavoq. Kapisip sakiaata nalaatigut allalerneqarsimavoq ersaanik.

Soorunalimi aamma kapiseqarpoq aarnuaqanngitsunik. Soorlu amerlanertigut paffiatigut, nasaatigut matertiatigullu ersisaanik kapisat pilerneqartartut. Arnussatut atuuffeqanngikkaluarlutik annoraap ammarngi nungullarnaveersaatigigaat.

## Ullutsinni misissuineq

Ullutsinni inalukkat nerisassiarineqartarput mamarsaatigineqarluartartunik, amerlanertigut nerisaatitoqatsinnut akugalugit nalliuottorsiornermilu nerisassiani takussaasarput. Nalinginnaaanerpaajuvoq inalugaq uuginnagaq. Inalugaq uusoq aqitsunngortarpoq, taamaliinnarlugu sassaallitigineqartarpoq imaluunniit orserlugu. Inalukkat panertitat aamma nerineqartarput, taakku kimittunerupput. Naak inalukkat nerisassatut mamarilluarneqarluartut atorneqartarneri ukiut ingerlanerini allanngoriartorsimavog.

Nereriaatsip allanngoriartornera nerisassallu allat pisiassanngorneri pissutaalluarunarput. Taamaattorli kulturikkut kingornussatta ilaat inoqutigiinni amerlasuuni attatiinnarneqarpoq aamma kinguariit tulliinut ingerlateqqinneqarluni. Taamaattumik suliniut assassinornerup aamma annoraamineq atorlugu eqqumiitsuliorneq ilippanaatai qaangerlugit inalukkat inuiaqatigiinni aamma allatut atorneqarsinnaaneri takutinneqarput. Nutaamik pilersitsinissamut periarfissiisoq.

Assassorluni suliariniarneqarneri aallartisannginnerini inalugak qanoq suliarineqartarnera sukumiisumik misissuffigineqaqqaarpoq. Suliniummi qangatut inalukkerisarnermi saliineq, panersiineq, qiortaaneq mersornermilu kilut sitsiaatsut atornerinik ilisimasanik katersuiffiuvoq. Sukumiisumik misissuereernerup inernerri maanna saqqummiunneqassapput, periutsit tulleriaarneri malillugit.



Kukkarnaaliortoq. Puisip inalugai aammik immerlugit issorsigassat. Tasiilami assilisaq ukioq 1935. Assiliisoq Robert Gessain. Assimik piginnittoq Nunatta Katersugaasivia Allagaateqarfialu.

Allattuuaqqap inalugai uullugit orsunut akuliullugit sassaalliutigineqartut (2025). Asseq nammineq pigineqartoq.


Ameq inalukkallu panerserlugit nivinngarneqarsimasut. Qaarusummi assilisaq ukioq 1936. Assiliisoq Jette Bang, Arktiske Institut.

## Misilittaanialeqqaarnermi eqqarsaat Puisi sorleq ?

“Oqaasiinnakkut tusaqattaarpala ussuup inalugaa kapisiliarineqartartoq igalaaliarineqartarsimasorlu” Sofie Amondsen oqarpoq, nangillunilu.

“Iqalunni Oqausimut Quviasuutiqarniq aamma Uqauhimut Quviahuutqarneq Ilinniartitsissumvik filmeeraliorsimallutik Nattiq 2024-mi pillugu saqqummiisoqarpoq. Aperivunga nalunnginneraat puisip inalugaanik suliaqartartunik takunikuunersut; ilisimasaqarnersut. Ataaseq akivoq: ‘meeraalluni eqqaamaniaraa ussuup inalugaanik atugaqartarnikuusut’.

Norgemiinninni Hysværet-imi, apriilip qaammataa 2025, qasigissat arfinillit nutaat pilappavut. Qasigissat angisuut marluk inalugai misissorlugit siulliup inalugai angerpasikkaluarput; ajoraluartumik qasigiaq ullut pingasut imaaniinnikuummat pilanneqarani, ilumiui qorsorpalummata tippassimallutillu iluatiginngilagut. Kingulleq qasigiaq anngajaaq nutaajutillugu inalugaa silissusaa silippallaanngilaq - aataarsuup inagulaanut silissusaattut assingulluni. Inalukkap takissusaa naatsorsupajaarakku 18-19 miiterimik takissuseqarpoq. Qasigissat mikinerit inalugai aamma naatsorsorakkit aamma taamak inalugai anginertulli takeqqatigijipajaarput.



Sofie Amondsen qasigiamik pilannera, Norge Hysværetimi assilisaq (2025). Nammineq asseq pigisaq. Kiisalu qasigissap inalugai amuneqartut, Norge Hysværetimi assilisaq (2025). Asseq nammineq pigineqartoq.

Allermiippoq: Ussuup inalugai, issimut panersikkat (2024), nammineq asseq pigisaq.

Nuummi Kittani ataatsimut misilittaanitsinni, februaarimi 2025, namminerlu puisip inalugaanik misilittaaninni nerutuneq mattunerlu innersuukkusutaralu tassaavoq: ussup inalugaa”.

Sofie Amondsenip puisit inalugai assigiingitsut misilittareerneratigut, puisip angisuup, tassa ussuup inalugai assassorluni suliaqassatilluni innersuuppi. Ussuup inalugai puiseqatiminut allanut sanilliullugit silinneruvoq. Silissusaa nassaarineqartarpoq inalugaq panerserneqareersimasup qullorneratigut. Inalugaq pullaqqalluni panerserneqareernermi kingorna qiorrneqarpat, inalugaq tamakkiisumik siaassaaq.

Atagu misilitakkat aallaavigalugit qanoq inalukkerisoqarsinnaanersoq quppernerit tulliuttuni pulaterfigilaariartigit.



# Inalukkerineq

Inalukkerinermi uagut atorsimasavut maanna saqqummiutissavagut. Eqqaamaneqaqqunarpooq inalukkereriaatseq allatorluinnaq aamma ingerlanneqarsinnaammat.

Inalugaq atorniakkat pissarsiarissavat. Inalugaq nutaajusinnaavoq immaqaluunniit qerisimasoq aatsinneqarsimasoq aamma atorneqarsinnaavoq. Qerisimatillugu imermut nillertumut inalugaq aasserneqassaaq. Inalukkat nutaat qerisullu assigiingissuteqarput; qerisimasup qiaavi (amerasaa) nipunganerusarmata. Kisialli tamarmik atorneqarluarsinnaalluarput. Inalugaq atorniakkat pissarsiareeriarukku ukua ujartussavatit:

Inalukkerinermi atortussat


- Kiliortuivik
- Uillup qaleruua
- Alussaat
- Qattaq
- Eqqaavik
- Iginneq (pigigaanni)

Panersiinermi atortussat

- Innerfissaq
- Ujalussiaq
- Kikiaaraq, kappoqquq
- Allunaasaq
- Manisivissaq
- Allarut

Mersornermi atortussat

- Imeq
- Iginneq
- Meqqut
- Ujalussiaq



Puisip inalugai amuneqartut ilusilersorneqarnerat. Ilusilersuisoq Magda-Maria Treur (2025).


# Suliarinera

## Siullertut

Inissilluarit. Timinnut qasunannngitsumik issiagit nikorfallutilluunniit. Sumiiffiit silaannarissarnissaa pisariaqarpoq.

## Seqeerlugu

Nutaajutillugu: Inalugaq imiinnarmik imaluunniit imaani aaverniarlugu salinneqassaaq. Ilumiui peerniarlugit seqeerlugu salilluaruk. Arlaleriaq seqeerlugu, imaarulluarnissaata tungaanut. Inalugaq nutaajugaluartorluunniit taarnersaqarsinnaavoq, tipippat taarnersaa qiorneqarsinnaavoq igillugulu.



Asseq qullermiittoq: Allattuup inalugaanik seqeersineq (2025).

Asseq allermiittoq: Ussuup inalugaanik saliineq (2025)



## Kiliortuivik

Ilnalugaq kiliortuivimmut ileriarlugu, isua allinngorlugu kiliorlugu aallartissinnaavat. Isua kilioqqaariarlugu, inalukkap isua tunginnut saateriarlugu; kiliorlugu ingerlaarsinnaanngussaatit. Kiliortuivik qisuuppat inalugaq aqukkuminarnerussaaq; tigummiuminarnerussaaq. Qisuk kiliortuivik apeqqutaavoq pujannersoq pujanginnersorluunniit. Siulivut kiliortuutaat sarnginik sanaajusunik qapiarfeqarput.



Asseq qullermiittoq: Ussuup inalugaa aallartinnerani kiliornera (2025). Kiliortuivik saanermik sanaaq. Ujallut inalukkallu imusat. Tasiilami ukioq 1885-imi katersat. Nunatta Katersugaasiviani toqqortaatigineqartut. Assiliisoq NKA (2025).

### Kiliut kiliornerlu:

Kiliornermi kiliut apeqquataalluni inalukkap qanoq naqitsiginissaa nassaariniagassaavoq putusuussanngikkanni.

Kiliornermi kiliutini iluarisat assigiinngillat. Innersuunnarpooq uillup qaleruaa. Taannaammat ikkiinnanilu ipippallaanngitsoq. Alussaat atorneqartillugu kiliornermi naqillualaagassaassaaq. Inalugaq sorleq atorneqarnersoq apeqquataavoq. Uumasut tamalaat inalugai qajannarsinnaammata, ussuup inalugaa qajannannginneruvoq, ersorseq kiliutigineqarsinnaallunilumi. Uumasut mikinerumaat saannernik inalugaqartarput, taakkuupput sallaatsumik kiliorneqarlutik suliassat.



Asseq qullermiittooq: alussaat atorlugu inalugaq kiliortorneqarnera. Qiterlermi: ussuup inalugaanik, ersorsimik kiliortuineq kiisalu asseq kingullermi uillup qaleruaanik kiliortuineq.



## Qeriteq

Kiliorneq ingerlaarluartillugu, inalukkap iluani seqiaa katersuutilersarpoq. Inalukkap aallartiffiani putua, seqiai pussullugit aniasillattaakkit. Kiliukkappit takissussaa apeqqutaalluni, naaffianut aamma seqiaa pussullugu aniatinneqarsinnaavoq.

Qiaava seqiaalu kiliornerani inalukkap silataani amerasaa manngernesaqarsinnaavoq, taannartaa taaguuteqarpoq qeriteq, kilioruminaassinnaasoq. Kilioruminaannersaani mianersuutassaavoq; kiliornerani naqilluaraanni putunissaa qaninnerummat. Qeriteq inalummut naqinniinnarnagu, kiliorutuivvinnut qeriteq piseriarlugu kiliutinnik kipisinnaavat. Mianernarpas piinngilluaannarsinnaavat putusiinnginnissaq piniarlugu.




Puisip inalugaasa seqiai alussaammik kiliorneqarneri.

## Inaluk

Inalugaq tamaat kilioreerpat, tassa seqiarlunilu qiaarneqareerpat, imermut tarajulimmut kininnejarsinnaanngorpoq. Kilioreernerani anguniagaq unaavoq: aaverluarnissaa. Inalugaq qattami kinisimatillugu imertaani takuneqarsinnaavoq aak. Annerpaamik ullut pingasut taartumi nillataartumi ajorsitinnagu kinisimasinnaavoq. Sivisuallaamik inalugaq imermi kinisimiatiillugu arriortortarmat imaluunniit tippakkiartortarmat. Qattap imaa taarsertaruk aaqarpallaarpat.

Allattuup inalugaa qiaarneqarsimasoq seqiarneqarlunilu.





Inalukkap sananeqaataasa ilusilersorneqarnera. Ilusilersuisoq Magda-Maria Treur (2025).  
Ameraasaq qalleq, qiaanik taaneqartarpooq. Ilorlerlu seqiaanik taaneqartarluni. Qiterliuvoq inalugaannavik.


## Panersnera

Inalugaq qattamiit qaqpinniqassaaq. Allarummik annoraaminermilluunniit allarterneqarsinnaavoq. Taamaaseriarlugu inalukkap isua siulleq ujalummik qileruk.

## Periuseq kisimiilluni

Inalukkap isua siulleq qileruk. Manisivissaq apeqqutaalluni inalukkat kittarneqarsinnaapput (kipineqarsinnaapput). Inalukkap takissusissaa nammineq aaliangeruk. Inalugaq pullareerukku isuata aappaq qileruk.

Inalugaq pullaqqasoq aamma allarterneqarsinnaavoq



Asseq qulleq: Kisimiilluni pullaaneq (2025).  
Asseq alle: Kisimiilluni pullaaneq, ukioq 1934,  
assiliisoq: Robert Gessain, NKA.

## Periuseq ikioqatigiiluni

Isuata aappaaniit pullaguk; inalugaq takisuujuppat/ilivitsuuppat ikioqateqarluni Isuata aappaaniit pullaguk; inalugaq takisuujuppat/ilivitsuuppat ikioqateqarluni pitsaaneruvoq. Pullannerani aappaata maluginiassavaa inalugaq putoqarnersoq, putoqanngippat inaluk pullangaannassaaq. Pullangaannarpat ujallumik qilersisoq piareersimassaaq isuata naanera qilernissaanut. Inaluk putoqarpat nilikkiartortarpoq. Inaluk nilikkiartorpat, putua nassaariniaqqaarsiuk. Nassaarippat putoqarfia pussullugu ujallumik nermullugu qilissaaq.

Pullaasoq inalugaq nilissagaluarpat pullaaqqinnissamut piareersimaannassaaq. Putui milereerpara aappaata ujalussiaq atorlugu pullaffiata aallartinna qilersinnaanngorpa.





### Qeritsivimmi panersigaq

Qeritsivimmi panersiigatta kontainer atorparput. Innerfinnik inalukkap nuui ujalussiamik qilersuuttarlugit. Inaluk pullanneqarnerani imulorassinnaanarpooq, siaangaanarluniluunnit. Inaluup nuui illuttut siaarlugit natermut arlaannulluunniit attuutsinnaveersaarlugu panersikkit.

Inalukkat panersernerini arlaannut attuusimatillutik ininittarput nippullutilluunniit. Qeritsivimmi inalugaq panersigaq qaqlorluni inerneqartarpoq. Maluginiaruk inalugaq paneriartupallattarmat.



### Silami panersigaq

Issilluartillugu nunamut tunngatinnavеersaarlugu maniguk. Inaluk issittumi panerseraangat qaqtilluni panertarpoq.



### Illup iluani panersigaq

Illup iluani taamatuulli, natermut arlaannulluunniit attuumatinnaveersaarlugu maniguk, qutsissumut allunaasalersuineq periarfissaavoq inalukkap nuui qilerfii nivinngarfissuiffiulluarsinnaapput. Illup iluani panersigaq qaqtinnatik inaluttaa akimut ersillutik panertarput.

Asseq qulleq: Qeritsiviup iluani panersiineq. Ississuseq -18 °C-imiit -21 °C tikillugu. Asseq qiterleq: Silami panersiineq. Silaa nillissusaa -5°C-imiit -8 °C angusarlugu. Kiisalu asseq allermi illup iluani panersiineq.



**Ussuup inalugai:** saamerleq issimut panersigaavoq. Qiterleq silami panersiaalluni. Kiisalu talerperleq illup iluani panersiaalluni, malugiuk inalugaq akimut ersarinnerummat.

## Qiortarnera


Maluginiaruk inalugaq qileruusaqarmat/killeqarmat, sukanganerusuttut ittoq.

Inaluk panerseriigaq qiortariaannanngorpoq siaarnissaa anguniarlugu.

Narlorinnerusunik naanilimmik inerniliiniaruit, qaarajunnersaatigut qiortaruk. Tassuuna qiorsimatillugu torernersumik naaffeqartutut issaaq. Inaluk mersussamaarukku una qiortaaneq innersuunnarpoq.

Qaarajunnersaatigut qiortarniarukku maligaasanik naaneqassaaq. Apeqquataassaaq inalummi suna naammassiniarnerit.

Inalukkat panernikut qiuutinik qiortarneqarneri.  
Qullermi ussuup inalugaa qiortarneqarpoq.  
Allergi aataarsuup inalugaa qiortarneqarpoq.






## Mersornera

Nunatta Katersugaasiviani katersaatigineqartut akornanni takuneqarsinnaapput suliat qanoq katiterneqarsimanersut, tassa qanoq mersorneqarsimanersut.

**Katersat ilaanniippukapisat, imak mersugaasut:**  
Nuilaani, paffiini akuanilu amermik erisaamik mattoqquteqakkajupput, avittanillu kusassaasersugaasarlutik. Erisaat inalummut mersugullugit akussitaapput. Akussitat tassaapput avittarnermi mersoriaaseq atorneqartartoq. Meqqut maminganiit aallartitaq, eqartaanut nisiaq. Mersornermi qummut ammullu meqqut mersornermi ingerlaartillugu. Katersani pussutsiinnavillugit mersukkanik aamma nassaassaqarpoq. Pussutsiinnavillugu mersorneq tassaavoq, mersugassat immikkoortut katitillugit, meqqerfii attuutsillugit, mersukkap sinaasigut mersorneq.



Asseq quleq: Kapisip manua qanillillugu assilisaq. Allalersuutai akussillugit mersugaapput. Inalukkat pussutsiinnavillugit mersorlugit katitigaallutik.

Titartagaq quleq: Mersoriaaseq; akussineq, meqqummik qummut ammullu mersorneq. Ilusilersuisoq Magda-Maria Treur (2025).

Titartagaq alleq: Mersoriassed; pussutsiinnavillugit mersorneq, mersukkap sinaasigut katitsillugit mersorneq. Ilusilersuisoq Magda-Maria Treur (2025).

**Ujallup silissusaa** - Sofie Amondsenip annertusisamik inalukkatt pillugit misissuinermini Inoqatigut Alaskamiut anguai. Tassani puisip inalugaanik misilittaasimasut naapillugit. Naapisimaarnermi oqaasitsigut ilinniartinneqarpoq mersornermi ujalorisaq meqqummiit silinnerunissaa. Taamaasilluni kilut nimilluarneqassallutik, suliaq sitsiaatsunngortinniarneqarpat.

### The needle eye

When threading the needle, the size of the needle eye must match the thickness of the thread. Equally important is the type of thread used, as this determines how the seams hold and how durable they are.

Inalukkatt assigiinngissutaat mersornermi maluginiagassaavoq inalukkatt panerserneqarsimanerisa assigiinngissutaat. Inaluk issittumi panersigaq qitunnerusutut ittoq; mersornerani qajassuunnarnervoq. Ulummattuunnissaa qajannannginneruvoq, tigummitillugu aqukkuminarnersutut illuni. Inaluk illup iluani panersigaq mattunerusutut ippoq, mersunnginnermi panersutsigassaavoq sissunnginnissaa anguniarlugu.

Issittumi aamma illup iluani panersikkat, mersorfissap nalaatigut iginnermik tagiunnissaa innersuunnarpoq. Taamaasilluni inalugaq mersornerani siikannginnerussammat.

Mersornermi misiliutit; asseq qullermi puisip iggiaa ujaloralugu mersorneq. Allermi inalugaq ujaloralugu mersorneq. Ujalorisaq tamatigut iginnermut misunneqarpoq.





Poq. Puup avittassai mersorneqarnera. Assiliisooq: David Ottosen (2025).

# Nutaaliorneq

Maanna inalukkamik nammineq assassorsinnaanngorputit. Inalugaq mersorsinnaavat, qalipassinnaavat ilusilersorluguluunniit. Assersuutigalugu: pooqattat, iperaasiviit,ippiarsuit, quilliup assiaqutaa iverutilluunniit inalunnik sanaajusut pilersinneqarsinnaalerput. Nammineq isummat aallaaviuvoq.

**Misussineq:** Misilittaanitsinni annoraaminernut qalipaatit misuutit atorlugit misussivugut. Sungaartoq, aappalorujuttoq qernertorlu. Taamannak misuussissagaanni inalugaq pullanneqannginnerani aamma panerserneqarnnginnerani pissaaq, tassa salinneqareernerata kiliorneqareerneratalu kingorna. Maskinamik misuussiniaraanni, misuutip puuani allaqasarput errorsinermi sorleq kissassuseq atorneqassanersoq. Inalukkat qalipaammik tamakkiisumik qalipaatininngikkaluartut, takuneqarluarsinnaavoq qalipaat sorlermik misunneqarnersut.

**Qalipaaneq:** Qalipaatit imilertakkat atorlugit aamma qalipaaneq atorneqarsinnaavoq. Taamannak qalipaassatilluni inalugaq salinneqareernerata kingorna aamma ingerlanneqassaaq. Inalugaq inereersimatillugu siaareersimatillugulu. Qalipaaffissiatulli allatuulli inalugaq qaavatigut qalipaaffigineqariaannaavoq

**Ilusilersuineq:** Apeqquutaavoq inaluk sumut ilillugu panersernerit. Manissumut assersuutigalugu puussiarsuarmut siaarlugu panerserukku, taava inaluk puussiarsuarmut attuumaffia panissaaq manissumik qillertumik. inalukkap inissisimaffini assigalugu panertarmat. Nammineq misilittaanitsigut arlaannut ilillugu ilusilersorlugu panerserneqarsinnaavoq.



Julie Bachip eqqumiitsuliani nikorsaqatigivaa tassasoq ‘Pifflup ingerlanerani attavik’ (2025).

Assiliisoq: Soffi Chanchira Larsen (2025).



# Nammineq assassornissannut

Maanna qanoq inalukkerisoqarsinnanersoq nutaaliortoqarsinnaanersorlu paasisimalerpat. Neriuppugut nammineerlutit peqateqarlutilluunniit inalukkerinissamik misilittaarusuttutit.

Aallartinnissannut atortussatit krydsersoriaannanngorlugit piareersaassuppatsigit:

## Pigaakka

- Inalugaq
- Siparni, qattaq
- Taratsut
- Kiliortuivik pujattoq
- Alussaat uilllluunniit qalerua
- Iginneq (pigigaanni)
- Eqqaavik
- Ujalussiaq
- Kakiaaraq, kappoqqut
- Allunaasaq
- Manisivissaq
- Allarut
- Qalipaatit (misilittaaniaraanni)
- Qiuutit
- Ujaloq, ujaluusaq
- Meqqut

Suliassama ilusilersuinnarlugu titartarnera

Notatit:

# Qutsavissat

Sammisaqaqtigiinnissamut periafissiillutik aningaasaliisut assorsuaq qutsavissaqarfigivagut. Aningaasaliisarfiit; NunaFonden, Tips- aamma Lottomidler pulje C (Namminersorlutik Oqartussat), Aage aamma Johanne Louis-Hansens Fond, Sermeq Puljen (Kommuneqarfik Sermersooq), Kulturudviklingspuljen (Aarhus Kommune), Statens Kunstmuseum (Slot- og Kulturstyrelsen), NAPA kiisalu Beckett Fonden.

Sammisaqaqtigiinneq kulturikkut kingornussanik siammerterfiunera taperserlusiuuk aningaasaliinissinnut qujamasuppugut. Anguniakkagut piviusunngortipparsi.

Tapersersuinissigut Sofie Amondsen kiisalu Julie Bach saqqummersitassaminnik pilersitsinissaminnik, misissueqqissaarnissaminnik, misilittaanissaminnik, inerisaanissaminnik siammerterinissaminnillu periafissiivusi. Illeqkoq Nunatsinni qaqlertotseqqinniarlugu sammisaqaqtigiinneq ingerlanneqarpoq, neriuut una pigalugu; inuit akornini inalunnik assassornissamik pilersitseqqiinissaq. Saqqummersitaliat isumassarsiorfissatut pilersinneqarput.

Kiisalu oqaluttuarisaanitsinni inalukkat qanoq atorneqartarneri kingumut paasissutissiissutigineqarlutik. Inalukkerineq ileqqutut imaannaanngitsoq, kusanartuliaasut nutaanik timitalerlugit, qanga ullutsinilu inuunitsinnut naapisinneqarput.

Annertuumik aamma qutsavissaraagut mersortartut Sara Marie L. Berthelsen aamma Johanne Markussen (Kittaneersut) inalukkanik misilittaaqatigaluta ilisimasanik pilersitseqatigigatsigut. Maannalu ilisimasaq pilersinneqartoq inuiaqatigiinnut siamarlugu takutitsissutigiligassinnut. Kiisalu Qasigiannguani katersugaasiviup aqutsisuanut Anne Mette Olsvigimut, siornatigut maannalu inalukkerillutik suliaqarnerminni ilisimasanik avitseqatigimmatigut. Taamatuttaaq Alaskami, Alaska State Museumimi, katersugaasivilerisut ittuata Addison Fieldip, katersugaasivimminni inalukkat pillugit saqqummersitaliaminnut atatillugu atuagaq pilersinneqarsimasumik tunissuteqarneranut. Atuagaq "Visceral: Verity, Legacy, Identity: Alaska Native Gut Knowledge and Perseverance' Sonja Kelliher-Combs aamma Ellen Carrlee-mik suliarineqartoq.

Minnerunngitsumik inalukkerisinnaanissamik periarfissiinerpaanut qutsavissaqarpugut - piniartunut. Ussuup inalugaanik pissarsiffigut Andrew Wong (Iqalunniit), tasiilamiit Anders Magdikalat aamma Sommer Tønnesen (Maniitsormiu). Aataap allattuuaqqallu inalugaanik pissarsiffigut, piniartut Nuummiittut; Ole Jonathansen, John Ottosen, UjuansinguaK' Kreutzmann aamma Andreas Olsen. Qilalugaq qaqortap inalugaanik pissarsiffipput Niels Mijunge (Qaanaarmiu). Sofie Amondsenimullu ikiortaalluartut Boas Poulsen aamma Camilla Lennert.

## Oqaatsit nassuaataasut

### Inalukkap taaguutai:

Inaluk = Mersornikkut annoraaliarineqartarpoq, igalassiarineqartarpoq atortussiarineqarlunilu

Qeriteq = Inalukkap silarlermi ameraasaq mattunerusutut ittoq

Qiaq = Ameraasaq qalleq

Seqiaq = Ameraasaq ilorleq

Seqeerlugu = inalukkap imarisai pussullugit aniasinneqarneri

### Inalukkanik annoraaliarineqartut:

Kapiseq = Annoraaq masannartorsiut (ataasersiut)

Kapisit = Annoraat masannartorsiutit (qasseersiut)

### Atuakkami oqaatsit atorneqartut:

Akussippoq = Mersukkat qaleriit qummut ammullu mersorneq ass. Avittarnermi mersoriuseq atorneqartartoq

Erisaaq = Puisip amia erisagaq

Ersorseq = kiliut amermut qitulisaat

Eqartaa = ammip sammivia, meqqerfiani ameq taartoq

Iggiaq = Puisip torlua/iggiaa, inalukkamut taarsiunneqarsinnaasoq

Ilisserut = Atisaliornermi ilusilersuinermilu najoqqtassiaq

Kiliortuivik = Kiliortilluni qisuk allequtarineqartartoq

Maminga = ammip sammivia, orsoqarfia

Panersutitsineq = Panivinngitsoq masavinnanilu

Sitsiaappoq = Pitarsinnaanngitsoq

### Assassornermi taaguutit atorneqartartut:

Akullit = Puisit inalugaa panertoq akullugu puisip neqaa orsualu uullugit

Avataasaq = uumasup aqajarua pullataq

Qapiarfik = Kiliortuivik. Qisuk im. arferup kiataa allequtarineqartartoq.

Qulitsaq = Tuttup amiinik annoraaliaq

Salummarsiineq = Panersiineq

Tuilik = Qajartuut masannartorsiut erisaaq

Ulummattuineq = Qitulisaaneq

Uluppa = Qitulisarpa

## Najoqqutarisat:

Arnat Peqatigiit Kattuffiat (1987). Ujallut. Pilersuiffik.

Büllmann, Martha (1990). Amminik suleriaaseq. Atuakkiorfik.

Birket-Smith, Kaj (2024). Ethnography of the egedesminde district. With aspects of the general culture of west Greenland. Meddelelser om Grønland no. 66.

Buijs, C. C. M. (2004). Furs and fabrics : transformations, clothing and identity in East Greenland. Mededelingen van het Rijksmuseum voor Volkenkunde. CNWS Publications, Leiden.

Cucina A, Schmidt AL, Di Gianvincenzo F, Mackie M, Dove C, Jakobsen AR, Grønnnow B, Appelt M, Cappellini E. (2024). Paleoproteomic identification of the species used in fourteenth century gut-skin garments from the archaeological site of Nuulliit, Greenland. Sci Rep.

Danmarkine katerssugausivigssûp naqiterritai (1948). Katerssugausivigssûp kalâtdlit nunâne pâsiniagai. No. 1, amerinek agdlunâtdlo.

Godfredsen, Anne Birgitte. Martin Appelt & Kirsten Hastrup (2018). Walrus history around the North Water: Human-animal relations in a long-term perspective. Ambio 47 (suppl 2).

Hatt, Gudmund (1914). Arktiske Skinndragter. I Evrasien Og Amerika. En etnografisk Studie. København, F. H. Schultz Forlagsboghandel. Geografisk Tidsskrift, Bind 23.

Kalaallit Nunaata Katersugaasivia (1985). Gustav Holmip Katersaatai. Ammassalimmut umiamik ilisimasassarsiornermi 1883-85 katersorneqarsimasut.

Kapel, Finn (2005). Otto Fabricius and the Seals of Greenland. Bioscience. Published by The Danish Polar Center (vol. 55).

Nunatta Allagaateqarfia. H.C. Petersenip allagaatai. P10.00.42.

Pisiniartoq 48 (1978). Annoraap (iggiap) allai. Den Kongelige Grønlandske Handel.

Pisiniartok' 11 (1966). Iggiak. Den Kongelige Grønlandske Handel.

Schmidt, Anne Lisbeth (2022). An Analysis of 600-year-old Gut-Skin Parkas of the Early Thule Period from the Nuulliit Site, Avanersuaq, Greenland. Arctic Anthropology (vol. 59, no. 2).